

# Il mund da sis giuvenils sursilvans

Nov film da Christian Schocher

■ **(anr/fa) «Giuventetgna dultsch utschi – Born in the Surselva» sa numna il film che Christian Schocher ha fatg en collavuraziun cun la TvR. Il film mussa in di en la vita da sis giuvenils sursilvans.** «Il film tracta da quai che jau na possed pli – la giuventetgna», ha ditg *Armin Walpen*, il directur da la SRG SSR idée suisse mardi a Cuira en occasiun da la premiera grischuna dal nov film da *Christian Schocher*. Che «l'idée suisse» veglia fortifitgar la solidaritad tranter las differentas parts dal pajais, ha'l declarà, «però er l'encletga tranter las differentas generaziuns». Ch'i saja impurtant da resguardar la diversitad d'opiniuns da giuvenils e vegls, «e per cuntanscher questa mira èsi impurtant ch'i possian vegnir realisads er en avegnir da quests films sco quel da Christian Schocher».

## «Gi gust da far ina giada insatge cun teenagers»

Il rescissur da Puntraschigna ch'è naschì dal 1946 ha realisà il film «Giuventetgna dultsch utschi – Born in the Surselva» ensemèn cun la Televisiun Rumantscha (TvR). Quai è gia la segunda produziun ch'els han fatg ensemèn: L'onn 1998 avevan pudì preschentar ils partena-

ris il film documentar «Paun jester ha siat crustas». En quel quintan diversas personas sursilvianas pli veglias da lur lavur sco stagiunaris en ils gronds hotels da l'Engiadin'Auta. «Sunter avair fatg quel hai jau studegià dus onns a la lunga tge sort da film che jau pudess far puspè cun la TvR», ha quintà Schocher mardi suentermezdi avant che mussar ses nov film als represchentants dals meds da massa. «L'ultima giada avev jau discurrì cun gliעד pli veglia, perquai hai jau gi l'idea da far questa giada in film cun teenagers.» Sia persona da contact en Surselva ed assistent da reschia è stà *Daniel Candinas*. Grazia ad el ha pudì emprendre ad enconuscher Schocher trenta giuvenils sursilvans. Sunter la tscherna èn restadas anc sis personas. «Las intervistas cun els ha fatg mes ami *Gian Andrea Reinalter*, il qual è redatur tar la TvR», ha ditg Schocher, «mo grazia ad el ed a Daniel èsi stà pussaivel da survegnir la fidanza dals giuvenils.»

## Senza far star mal

Ils sis protagonistas sa numnan *Flurina*, *Guido*, *Janis*, *Jasmin*, *Martin* e *Teolinda* e derivan da Sumvitg fin Sagogn. Els emprendan professiuns sco tgirunza, vernischader d'autos, laboranta da chemia u

mecanist d'autos. Els èn tuts a la tschertga da l'atgna via, tranter tradiziun e moderna, tranter patria e desideri dal lontan. Avertain quintan els da lur sentiments, da lur experientschas cun la sexualitad, da lur siemis e da lur miras. Il rescissur na fa star mal ils singuls giuvenils e'ls lascha dir lur opiniun senza valitar quai. Ch'el haja adina empruvà da restar fair, ha ditg Christian Schocher. Il fatg ch'ìls giuvenils umens èn en la minoritad nun è tenor el mo per cas: «En quell'etad da la pubertad èn las giuvnas pli interessantas e lur opiniuns pli differenziadas.» Quai badan ins surtut tar il chavazzin «politica»: Guido e Martin decleran ch'ìls esters en Svizra veglian mo profitar e ch'els dus hajan simpatia per las partidas a dretga. Da l'autra vart manegia gist quella giuvna che lavura en la gronda fabrica da chemia sper Cuira ch'ìls temps s'hajan midads e ch'ì fiss uss necessari che la Svizra s'avriss pli ferm vers anora... Il film da Christian Schocher è fatg da maniera professionala e dat in'invista simpatica en ils patratgs dals sis giuvenils sursilvans.

**Datas d'emissiun: L'emprima part dumengia, ils 27-01-02 a las 17.00, repetiziun sonda, ils 02-02-02 a las 11.50 sin SF1. La segunda part dumengia, ils 03-02-02, a las 17.00 e repetiziun sonda, ils 09-02-02, a las 11.50, er sin SF1.**



Christian Schocher ha plaschiar da ses nov film «giuventetgna dultsch utschi», (malgrà tscherts problems tecnicos ch'el ha gi cun al preschentar).